

Klibur Solidaridade Timor-Leste/ Timor-Leste Solidarity Group

Sekretariadu: Oficina Asosiasaun HAK, Farol, Dili, Timor-Leste

Telp. +670-331-3323, email: timorsolidarity@gmail.com, www.laohamutuk.org/solidarity

Deklarasaun husi Konferensia Solidaridade husi no ba Timor-Leste

29 de Agosto 2009 - Iha aniversariu tinan 10 Timor-Leste nia vota ba independensia, ativista sira husi kontinente 5 halibur hamutuk atu reafirma sira nia solidaridade ho nasaun independente foun ne'e. Ema liu 200 husi grupu solidaridade oi-oin, husi nasaun 18 deskuti kona ba kontinuasaun nesesidade ba justisa no akuntabilidade. Aleinde atu hapara impunidade ba sira ne'ebe komete krime kontra umanidade no violasaun direitus umanus sira seluk durante okupasaun illegal Indonesia, partisipantes sira hari hanoin atu hatan ba asuntu atual sira, hanesan justisa ekonomia, justisa generu no West Papua.

Partisipantes sira ne'ebe tuir konferensia lora tolu, "Hametin Solidaridade: Luta nafatin ba Justisa" mai husi idade 15 to'o 85. Sira haksolok atu simu sira ne'ebe luta hamutuk ba Timor iha tempu naruk ba luta ukun rasik an hanesan Carmel Budiardjo husi TAPOL iha Inglaterra no James Dunn, eis diplomata Australia ne'ebe haruka ba Timor Portugues iha tinan 48 liu ba. Juventude Timorensis barak mak entusiasmu atu partisipa, troka ideia ho ativista veteranu husi Timor-Leste no rai liur.

Partisipantes sira husi Timor lara no rai liur, servisu tiha ona ba auto determinasaun ba rai ne'ebe hetan okupasaun. Sira halo kampanye hamutuk liu tinan 10 atu hapara okupasaun Indonesia, ba direitu Timor oan sira nian atu deside destinu politika ne'ebe ikus mai atinji tiha ona wainhira sira vota barak liu ba independensia iha 30 de Agosto 1999. Partisipantes Timor oan no internasional sira reafirma sira nia komitmentu atu suporta Timor-Leste atu hari sira nia nasaun foun bazeia ba justisa ekonomia, justisa legal no justisa sosial.

Ema nain tolu ne'ebe ativu iha rai liur no dadaun ne'e sira tur iha pozisaun a'as Governo nian iha Timor-Leste independente koalia iha konferensia. Presidente José Ramos Horta ho haksolok fo benvindu iha konferensia ne'e, koalia kona ba historia ninia amizade ho ativista solidariedade veteranus sira ne'ebe marka prezensa iha konferensia ne'e. Mari Alkatiri, sekretariu geral Fretilin no eis Primeiru Ministru, hateten ba partisipante sira ne'e katak "se ita la kontinua koalia kona ba justisa, diak liu uluk ita la hanoin atu ukun rasik a'an". Agio Pereira, Sekretariu Estadu ba Konseho Ministru mak taka konferensia.

Partisipantes Timor oan sira no internasional sira fo suporta ho entusiasmu ba luta ba auto determinasaun ba Papua Occidental no Sahara Occidental no hapara regime militar iha Burma. Sira ejiji ba Governo Sri Lanka atu hapara violasaun direitu humanos. Sira mos klaramente liga justisa ba Timor ho demokrasia no direitus humanos iha Indonesia. Partisipantes sira fiar tebes katak sira seluk tenke hetan benefisiu husi solidaridade internasional ne'ebe hato'o ba Timor-Leste ba tempu naruk.

Iha lora dahuluk konferensia, aktivista solidaridade sira husi Indonesia no Irlanda, feto Timor-oan nain rua, ida ne'ebe servisu hamutuk movimentu solidaridade husi railaran no ida seluk husi Australia. Sira fahe sira nia esperiensia no analiza kona-ba aktividade ne'ebe konsege hetan referendum. Ema ne'ebe involve iha luta ba direitus humanos no autodeterminasaun ne'ebe seidauk remata ba Burma, Sri Lanka, Sahara Occidental, no Papua Occidental ezije partisipantes sira atu hato'o sira-nia solidaridade. Koalia-nain iha lora daruak ko'alia detalhadu kona-ba rezultadu husi impunidade, no mós obstakulus no mekanisme sira atu hetan justiza ba krime ne'ebe komete durante okupasaun brutal nian.

Grupus lima diskuti kona-ba aksaun solidaridade iha futuru ho topikus oi-oin. Grupus justiza reafirma nesesidade atu hapara kultura impunidade liu husi harii tribunal internasional no ezije koordinasaun diak liu-tan ba aktividade internasional no lokal ba justiza. Sira husu diseminasaun maka'as liu ba *Chega*, relatoriu final ne'ebe CAVR hasai tiha ona. Grupus kona-ba justiza ekonomiku apelu ba desenvolvimentu ne'ebe povo sai nu'udar ninia sentru ne'ebe fo benefisiu liu ba sidadaun Timor-Leste hotu-hotu, transparensia ne'ebe klean liu-tan, no akuntabilidade husi governu. Grupus justiza jeneru apelu ba hadia sistema judisial atu suporta diak liu-tan vitima sira husi konfliktu durante tinan barak. Grupus solidariade povo ba povo no relijiusu anima denominasoen relijiuzu sira atu involve sira-nia aan iha servisu ba

justiza no akuntabilidade. Sira mós husu ba informasaun liu tan kona-ba asuntu direitus humanus ba povo Timor-Leste. Grupu solidaridade ba Papua Occidental suporta maka'as autodeterminasaun ba teritoriu ne'ebe Indonesia kontrola.

Konferensia ezije ba governo Timor-Leste, comunidade internasional, no ONU atu halo asaun ne'ebe bazeia ba prinsipiu kontra impunidade, no ezije harii tribunal internasional ba Timor-Leste, hodi dehan katak la bele iha impunidade ba krime graves ne'ebe akontese durante 1975 to'o 1999. Konferensia mós ezije atu fo atensaun ba vitima husi violensia seksual iha tempu okupasaun Japones (1942-1945).

Konferensia husu ba Parlamentu Nasional Timor-Leste atu halo debate kona-ba rekomendasaun sira husi CAVR no Comissão de Verdade e Amizade (CVA). Sira ezije governo Timor-Leste atu implementa rekomendasaun sira husi *Chega*. Governu husi nasaun sira seluk mós tenke implementa rekomendasaun sira ne'ebe CAVR hato'o ba sira. Governu no Parlamentu Timor tenke tau matan ba vitima sira husi okupasaun nian no mós violensia entre Timor-oan sira. ONU mós tenke harii fundus atu suporta vitima sira husi okupasaun. Konferensia ejizi kooperasaun atu resolve kazu labarik no ema sira ne'ebe lakon tiha ona. Problema "refugiadus timor oan sira uluk" iha Indonesia nian mós la bele haluha. Kondisaun sira nia moris nian sai aat tinan ba tinan.

Partisipantes sira mos amplifika lian vitima funu nian, vitima violencia no okupasaun no dudu governo sira nebe responsabliza atu hadia vitima sira nia kondisaun moris. Ita presiza hadia baze de dadus nebe halibur ona kona ba vitima sira (inklui vitima violensia sexual); NGO sira presiza konsolida data sira nebe sira halibur ona (kona ba vitima pasadu no prezente nian), no uza data sira ne'e atu hapara siklu violensia.

Konferensia nee ezije atu hapara impunidade ba autor nebe involve iha oho ba lider politico Papua nian no aktivista direitus humanus nian, inklui Arnold Ap, Opinus Tabuni, Theys Eluay no ninia xofer Aristoteles Masoka. Participante sira ezije atu iha dialogo entre governo Indonesia no representante husi povo Papua nian. Sira ezije governo Indonesia nian atu halao avaliasaun ida kompreensivo kona ba implementasaun "Autonomia Espesial" iha Papua Occidental no loke nia resultado ba publiko. Paricipante sira mos ezije agensia internasional sira no mos governo nebe suporta "Autonomia Espesial" tenki halo avaliasaun no hare fila fali apoio ne'e. Sira mos ezije atu fo livre ba prizioneiro politico Papua Occidental nian mak iha nebe deit, inklui sira nebe detem iha Polisia Regional Indonesia nian husi Papua Occidental iha Jayapura.

Konferensia nee kondena ataka foin lalais Morocco mak halo kontra ativista no sira nebe defende direitus humanus iha Tan Tan, Morocco. Participante sira mak fo sira nia solidaridade ba implementasaun akordo dame nian iha Aceh, no mos ba resolusaun ho dame ba konflitu iha Mindanao.

Partisipantes sira mai husi Australia, Canada, Inglaterra, Finlandia, Fransa, German, Indonesia, Irlanda, Japaun, Nederland, Nova Zelandia, Filipinas, Portugal, Sri Lanka, Timor-Leste, Estados Unidos Amerika, Papua Occidental no Zimbabwe.

Fundo mai husi CAFOD, Catholic Relief Services, Caritas Australia, Caritas Aotearoa (New Zealand), Development and Peace, HIVOS, Progressio, no mos Trocaire. Konferensia nee mos hetan suporta husi participante sira no mos husi grupos hirak nebe mak involve iha Klibur Solidaridade.

Konferensia nee nudar parte ida husi aktividade sira seluk inklui ezebisaun nebe hatudu aktividade solidariedade global iha tinan barak nia laran, oras nee dadaun loke iha Fundasaun Oriente, Dili to'o loron 5 de Setembro. Aktivista sira husi rai liur mos halo vizita hamutuk ho estudante Timor sira ba comunidade sira iha rural hanesan Maubisse no Ermera atu loke sira nia komprensaun kona ba povo nia moris lor-loron nian no oinsa sira bele kopera atu hetan benefisio komum.